

友  
雅

共和八年購於上海博古堂  
珠還室珍藏



友雅卷中

五言律詩

李夢陽

郊觀齋居東邊喬二太常

人日過仙院春霞縹緲分碧回瑤澤草紅綻蕊宮雲  
獨處依松樹清齋對鶴羣桃源知竝入惆悵不逢君  
卧病酬邊君天壇步月見懷之作

霽夕開芳甸祠官悵獨遊銀潢橫殿落壁月抱壇流  
漢時饒烟霧秦城逼斗牛甘泉詞調絕疲病若爲酬  
南陽宅訪徐禎卿

東閣能留第南人暫亦居琴書遷卧內騎馬到堂除

豫章朱多炤

孔陽





殘樹喧巢鵲微風走壁魚追思秉鈞日冠蓋爛盈閭

周高刊

風夕柬徐子

嚴冬萬卉寂朔吹迴添愁嶺日微含照川雲半逆流  
頻齋忘肉味乍冷覓羔裘差勝山陰夜能孤訪戴遊  
得何子過湖南消息

及遇荆門信洞庭秋已淒湘江饒苦竹幾聽鷓鴣啼  
馬援留銅柱王褒祀碧鷄向南衝瘴癘藥物公曾携

憶何子

其兄時為巴陵知縣

憶爾辭京日余歌萬里行經秋無過鴈索處若為情  
去已窮滇海歸應滯岳城鳳凰池上草春到為誰生

何子至自滇

醉折荷花別寧期花復開川原一回首雲日共徘徊

知向百蠻去云從三峽來進舟雖一賦胡弃楚陽臺

答何子問訊三首

伊汝投簪日憐余罾網羅江湖鴻鴈絕道路虎狼多  
萬死還鄉井潛身葺薜蘿天涯歲仍晚無路覓羊何

其二

仲夏辭梁地中秋出夏臺醉行燕市月留滯菊花杯  
日暮千行淚天寒一鴈來亦知張季子不為食鱸迴

其三

弱冠真憐汝投閒更可哀山高桐栢觀水曲范滂臺  
假寐憑巖桂潛行倚岸梅此時誰借問日短暮寒催

阻雨明港寄何子二首

白日雲應動青山雨忽來計程今夜會策馬出村回

月對荆門上天從夢澤開旅燈依港宿吟苦獨徘徊  
其二

微微山日舒彼美碧山隅信宿猶難遣經年祇重吁  
花含明日艷月助此霄孤久擬申城醉香醪語爾沾  
繁臺書院同邊子三首

壺觴聊首夏文史更孤臺地主更來幾登臨每復陪  
徑蘭迎節秀岩鶴撲驄迴落日凭軒外蒼蒼四岳開  
其二

駐賞林紅減登吟野綠圍故人率爾遇時序暗中違  
氣突芒碭斷雲低子盃澤飛昔賢誰復此無美酒酣歸  
其三

興劇攀巍坐翛然俯日斜亭扶盤石樹崖綴殿春花

薜服賓遊憶青衿閃鈞槎綢繆不欲別風野暮鳴笳

寄李濂兼呈何子

仲言何遜字

識汝塵埃際飛騰步步高許身元稷契努力更風騷  
暫亦遊香署終能奪錦袍仲言應過數萬里兩鴻毛  
邊君生日來訪時近中秋不虞雷雹二首

惟爾生辰日高軒特過吾秋驚飛雹至雨逐太雲無  
上壽須君子同聲愧老夫毋勞問隱顯乘月有清壺  
其二

雹過天仍雨庭空晚復雷連牀慨往昔阻馬得徘徊  
暗蘂香宿席秋燈焰壽杯非君有家慶肯放夜輶迴  
繁臺秋餞何子二首

會少憐君暫臺孤引望頻清秋屬過鴈落日有征人



華嶽元通洛黃河不棄秦異時愁獨上千里見嶙峋

其二

候吏催遲暮遊人怨解携十年內供奉萬里竟關西  
地古饒文物時平罷鼓輦巡行有佳興應徧絕崕題

再餞何子

武塲重布席文士此分襟人世東西路秋天旦暮陰  
杯光搖弱草庭色下饑禽他日關中使無忘汴上音

邊貢

寶應元夕飲朱升之舍

望望安平驛春行路不遙故人還此地芳序且元宵  
水近潮通閣燈寒月過橋計程拚取醉佳賞更須招  
郊壇夜步

晚步凌高榭春空月正明星辰臨漢時樓觀俯秦京  
靜夜松飈響豐年穀日晴同心隔城市相望轉盈盈

同心蓋指李獻吉故  
李有酬天壇步月詩

行子

行子到京舍故人謂李獻吉消息傳釣魚吹臺下築室黃河  
邊插架餘千帙傾囊有一錢古來賢達者往往在林泉

懷昌毅大理二首

孺子南州彥詞華早擅塲共憐廷尉府祗益簿書忙  
寶斲愁鸚鵡鹽車困驢驢何時一艇公共爾泛滄浪

其二

齋房隱薜蘿野外少人過向月復誰語看山空自歌  
城孤戍火亂地迥北風多惆悵離屈夕相思奈爾何

過汴呈獻吉

兩年京郭居空望故人書五月梁園道來乘長史車  
川流赴海急隰日漾沙虛欲訪漁樵徑蓬蒿不可除

雨中憇雙泉寺

野寺臨官路山門俯近郊閣虛鐘梵寂院靜薜蘿交  
密雨沉蛛網閒雲擁鶴巢故人詩在壁惆悵隔衡茅

壁間李子題詩。朱子曰按李集有題寺壁五言二絕句

答西橋大復二君

丙子之歲客遊兩河辱劉何二君聯句惠  
寄庚辰仲春屏煩抱痾林居值雨檢覲前  
翰悵焉起懷步韻二章爰申情抱云爾鳳  
蟬音旨豈曰同哉

憶在中州日曾傳上苑歌暮雲千里隔春草四季過  
漢殿仍金馬秦關且玉珂報章慚獨晚才力謝羊何  
其二

懶性真成癖哀吟不當歌田園自開闢城市少經過  
雨卧山迴枕春行柳拂珂馬周頭漸白無日見常何  
何景明

立秋寄獻吉

山城一葉下水榭已迎秋夜迥商風至天空大火流  
稍蘇司馬病翻遣宋生愁日暮關河外思君重倚樓  
懷李獻吉二首

聞君在羅網古道正難行無使傳消息憑誰問死生  
東方元太歲李白是長庚才大翻流落安知造物情



其二

冠蓋京華地斯人獨可哀  
神龍在泥淖朱鳳日摧頽  
世路無知己乾坤孰愛才  
梁園別業在何日見歸來  
過君采次韻二首

海內風塵隔天邊江漢流  
昔牽春草夢今竝玉珂遊  
神駿元千里仙人自十洲  
慚隨燕雀輩白髮世間愁  
其二

自君來此地謂我頗同流  
復往江湖太寧忘霄漢遊  
龍蛇蟠海曲鴻鴈向河洲  
從此風波隔長安日暮愁  
世其宅夜集同君來作限難字

冬夕具盤餐明燈坐不寒  
獨憐竹葉盞仍對菊花團  
素月縈窓細高雪傍苑殘  
美人江國太惆悵采芳難

寄空同子卜居襄陽

爾定襄陽宅雲山好傍誰  
草鄰王粲井花醉習家池  
留滯悲江漢驅馳感歲時  
扁舟空悵望未有鹿門期  
贈鄭佐

老鄭空同客長歌北海尊  
十年舊賓友誰到李邕門  
天地頻回首江湖一旅魂  
關城獨歸鴈風色傍黃昏  
君采迂居

宅卜宮墻近堂開燕雀馴  
遷居憐客次過覓喜吾鄰  
題竹元因主看花更屬春  
知懸孺子榻虛薄愧高人  
春日劉薛二子過

林花寒不折城鴈日喧呼  
壯覺風情減春增旅興孤  
經過留翰墨潦倒念江湖  
未似高陽侶垂鞭向酒壺



十月望夜劉薛二子過對月

院寒冬月白城夜海雲收上客拔蘭省清光近鳳樓  
關山一北望河漢迥西流未見乘槎使迢迢上斗牛  
自滇蜀歸李戶部馬舍人見訪

官舍掃莓苔故人尊始開相違頻問訊乍見各徘徊  
瘴癘一身在風塵萬里來欲詢滇蜀勝慚愧子長才  
過子容有懷獻吉

故友何人在常時獨汝遊停盃思北海躍馬爲南州  
雨助鳴蛩夕風驚過鴈秋有懷俱不減携手重遲留  
得鄭繼之書

鄭生湖海太高興渺難降累月音書數清秋涕淚雙  
天邊登越嶠雪裏渡吳江萬水千山暮何時到爾邦

徐禎卿

酬邊太常於燕山見憶之作

故人惠思我百里寄瑤音獨在山中宿松齋清道心  
霜鐘流夜壑曲澗入幽琴寂寞悲千古橋陵梓橡深  
駕出南郊退簡邊喬二太常

齋殿鑿輿下郊宮鳳野開霜戈迎日動芝蓋拂雲來  
輦道前旌直鈎陳翼騎迴甘泉枚朔侍詞賦接仙才  
人日柬李員外出陪郊祀

咫尺東曹彥相思隔暮雲仙源懷獨往青鳥信難聞  
齋館逢人日天行望羽軍 聖朝郊禮秘應待長卿  
文

秋日懷李郎中及邊熊二君子五首

今錄其四



秋興因高賦雄才憶省郎山川思不極雲樹莽蒼蒼  
對酒知時變看花感別長如何霜後鴈猶未達瀟湘

其二

借問關中友新詩近轉多風煙興難盡搖落意如何  
熊子元相得邊丞定數過誰能念離索樽酒邈山河

其三

昨日逢京使聞渠再轉郎未妨文字癖祇益簿書忙  
退食遲宮旭鳴鐘候省堂祇應騎瘦馬緩轡漫成章

其四

每憶邊庭實才清官更閒齋心裡祀裏單思藝林間  
名致諸公早詩卑大曆還曹劉塵未遠任爾好躋攀

過喬侍郎省中因懷獻吉

東掖當年署長廊故柳斜久辭陳子榻重謁謝公衙  
廳事垂蛛網高簷噪晚鴉風煙那可憶飄泊惜瑤華

鄭善夫

對雪畲太白山人

天地忽改色六花風亂投倏然翠袖薄加我草堂幽  
照水梅自媚閉門君不憂玄機正無極將汝醉鄉遊

江上別道宗兼懷仲默

却向滄江別潛然感物華林泉移歲月霄漢變雲霞  
仗劍亦駭俗出門寧顧家寄言何水部遲爾折梅花

山中對孫太初食黃精

山中黃精熟作意向山人製法隨菜曝靈根集鬼神  
腹心吾尚病服食爾能純有客乘雲氣三尸不累身



答孫太初見寄

平生孫處士雲水誼難忘遁世思公輩卜居真此鄉  
名高多寂寞道在亦翱翔徐福終入海蓬萊意甚長

答薛君采見過

薛稷過逢日新詩向我傳聊炊太倉米一誦陝郊篇  
薄宦虛談劍危時合引年秋風下滄海擲置廣文氊

過孫山人茗溪舊居

耿耿憶孫楚溪邊青竹門未同茗水月竟失漢陰原  
壽夭真銓外風塵孤夢存平生少谷榻獨下向誰論

太初茗溪草堂爲余設少谷山人榻請余東歸余歸而太初死矣

謁太初墳

草堂琴瑟罷羽化意何如那復烏藤杖空傳白鹿車

岩丘亦鐘鼎天地卽蘧廬白首林君復終無封禪書

其二

伊昔丘園隱風流誰似君談詩振大雅抗志入高雲  
宅擬王官谷山名太白墳寥寥廣陵散定向夜深聞

寄劉希尹吏部兼懷薛君采

長安薛子宅對爾誦驪駒雲樹懷良友風塵愧腐儒  
看山費日月憂國阻江湖方朔金門下藏身道不孤

其二

薛郎成小隱舊宅定荒蕪萬事將雙淚經年無尺書  
身隨梅福去病與馬卿殊白日調龍虎飛騰意有餘

哭仲默

去年孫復死今復哭何休霄漢冥交盡嵩邛正氣收



操戈吾豈敢懷寶爾終投祗益文章價年年照斗牛

薛蕙

九日同何仲默出郊

九日登高會同人載酒來寒城一以眺秋色正堪哀  
零雨晨初霽浮雲午未開南飛有鴻雁爲爾立徘徊  
病中何仲默蔣子雲過訪

何人顧寂寞盡日少懽娛慰藉煩知己扳留強病軀  
濁醪來近市野飯出中厨珍重交親意艱難愧腐儒

寄何仲默

久別憂成結書來不解顏開緘未讀半攬涕望秦關  
簿領余方倦馳驅君詎閒相將保玉體太公入名山  
同大復避暑寺中

携客東林院涼宵掃竹亭龍珠寒露殿寶樹影雲高  
聽法元清淨觀心自杳冥坐中餘爽氣虛對北山青

寄孫山人二首

吾憐孫處士萬里狎滄波海色占龍臥天風聞鳳歌  
誰言竄身遠尚畏取名多相望宜其外虞人奈爾何

其二

有客今何事江邊采日華行穿四明雪坐對赤城霞  
中散寧爲吏梁鴻不顧家思君入吳會築室鍊丹砂

孫一元

春日吳門和李獻吉見寄二首

春水動幽興江行人跡稀青楓隨岸斷遠鴈與雲歸  
過雨花經眼停舟山近衣長吟愁落日雲外看餘暉

其二

漫艤吳門棹因成極勝遊野吟峰影出林臥草光流  
帆面過江鳥雲陰開晚洲狂歌聊自得隨地覓巖丘  
鄭繼之地官又不過湖上奉簡

恠爾狂吟客不過湖水濱寧遭官長罵莫得野人嗔  
雲外烏藤杖水邊白鷺巾相看只自好空送月華新

寄鄭繼之

少谷平生友青雲半載離豈忘吳地客不寄鴈門詩  
嘯傲定何日經綸須此時後期解朱紱同飽九莖芝

五言排律

李夢陽

簡何舍人二十韻

黃扉通內閣左順切文華密勿君臣契尊崇禮數加  
詞頭存故事國體與宣麻奏絕銅函密封非墨勅斜  
四門欽舜闢隻日鄙唐邪乾斷人心協風淳主德遐  
萬方成就日六合迥爲家司馬元牛走臥龍曾兔豨  
吹噓振羽翮變化奮泥沙邦計思劉晏兵謀愧左車  
分番春扣闥捧牘晚歸衙影拂垂城草香携出苑花  
讎經遠白虎投筆困青蛇每憶仙池鳳私慚省樹鴉  
拘羈那有適追琢冀無瑕不忍醒爲醉胡由玉倚葭  
聖朝巢父耳荒里邵平瓜稔抱丘園欲私祈紀運嘉  
鳴文極燕許熙載老姬牙帝澤川歸海浮雲莫蔽遮  
哭徐博士二十韻  
乾坤風色暮江漢哭斯人棘寺翻飛日文園久病身



數奇官竟左材大命須貧放浪原遠癖羈淹祗爲親  
赤城終羽節壁水暫儒紳鷓鴣偏垂翮鯨鯢不縱鱗  
回歿豈道薄屈憤轉時屯藥石竟能返龍蛇識亦直  
楚狂嗟鳳鳥魯叟泣麒麟邂逅京華始風雲氣象新  
遶鷓陪玉笋倚馬接華裯宅燕南陽月花吟東部春  
回頭成宿昔開眼漸風塵妻子今誰託文章後益振  
王喬跨鴈鵠傳說化星辰松栢丘墳岬灰沙劍舄陳  
閭門寒擊甕吳水痛沉珎宿草扁舟阻生芻絮酒伸  
碑非蔡邕愧誅豈仲宣倫獨把延陵劍吞聲淚滿巾

何景明

寄徐博士二十二韻

有美雲間士才名洛下傳逢時不得意謫宦轉悠然

殊渥優文學清階謝糾纏班行亦霄漢官侶是神仙  
樓閣星辰麗宮墻日月連院桃紅爛日闕檜碧參天  
賈誼爲王傳陽城淑後賢諸生攻誦法六館藉陶甄  
玉序金鏞列虛廊石鼓懸雅音淒古調竒字索遺鐫  
劉向憂經術揚雄困草玄羅傷廷獄宅座嘆廣文璫  
魯壁藏書日齊門鼓瑟年青襟時涕淚學士盡奔遷  
鸚鵡愁金絡麒麟恥玉鞭客心千里鴈歸興五湖船  
上國同傾蓋長宵更接筵彩雲停翠管白雪繞朱絃  
悵別燕臺下淒涼楚水邊海鷗終浩蕩天馬自騰騫  
朋舊稀相見江湖益可憐因風問消息尺素幾時旋  
寄邊太常

不薄淮陽守翻辭大省寮聯翩追近地奉引憶先



朝碧落仙人館銀河織女橋漢儀瞻鹵簿虞樂典簫  
韶日月旂常動星辰劔佩搖聳身殊道路回首隔雲  
霄河內猶宜借山陰豈見招乾坤五馬貴江海一麾  
遙雅識懷金奏同遊嘆玉鑣歲年雙轂轉岐路一蓬  
飄鸞翮終難鍛鷺遷本在喬九苞應不遠覽德是何  
朝

徐禎卿

九日期登大慈恩寺閣不果寄獻吉

悵憶青蓮宇今朝黃菊開遙知遠公嘆不見白衣來  
窈窕人天閣崢嶸日月迴山川紛楚望城闕動秋哀  
峴首羊公石淮陰戲馬臺風烟那可卽逸興杳難裁  
強負登樓作虛傳落帽才此時遙獨酌念爾重悠哉

於武昌懷獻吉五十韻

豈是乘桴客棲棲楚水陽故人多放斥吾道轉淒涼  
寵辱今如此沈憂不可忘隋珠元按劍荆璞自離殃  
似爾青雲器誰言世網傷王風紛墜地冥契獨升堂  
逸擬曹劉駕清聯沈謝行劉星分漢署白雪映仙郎  
能使尚書重深揚國士光在公勤夙夜於古準羔羊  
側席遭仁聖求言渴禹湯靡躬懷骨鯁有疏削豺狼  
那信黃金鑠萋然貝錦張孤誠回日月萬死出風霜  
直道焉辭辱庸夫或笑狂始知天德廣曲納海流長  
賈誼猶投楚鄒生故泣梁如何捐虎口忽已訝雲翔  
我識從偕計觀風美大唐謬通仙籍末賜對玉墀傍  
食粟真爲竊河清詎有常寧論供黼黻祇爾奉趨鏘



迺邁同心彥陪遊古藝場夜閒堪秉燭日旰尚含香  
莫逆談恒劇從容寢不遑允求諧比興端可發宮商  
疏越宜宗廟華蟲傍袞裳淵衷深禮樂文化蔚巖廊  
豈謂奄徂落還應厭治康雙傾泰陵淚俱斷杞人腸  
赤子居猶喘蒼天意叵量河山開紫氣符瑞轉宏綱  
漸歷輿圖遠欣瞻帝座昌聲靈掃烏合英德邁龍驤  
姬旦匡周室相如侍武皇俄看霾霧鬱半覺老成亡  
鱗逆櫻須斃乾行斷自剛內林鳴啄吻丹闕慧浮芒  
逐客無寧跡窮途不裹糧厲階生枳棘芬餌挂鸞凰  
西公仍秦苑南歸定汴鄉驚飛憐帶繳欲往嘆迷方  
憶向青門別重凋季月芳幾時申契闊絲此卜行藏  
太潔爲身累虛名與世妨悲歌空翫髒中路惜彷徨

潛伺亨陽復終焉履善祥達人聊麴蘖隱士且庚桑  
鴻鴈紆關塞江流極沅湘遙知懷逐侶一爲奠椒漿

憶升之

此見朱刻附錄若徐外集諸詩固不必

昔卧廬山峽聞君入蠡湖雲帆搖石鏡波影靜天吳  
去作南昌客飄然下玉鳧仙人留舊館都督盛新模  
落筆揮鸚鵡榮觀四座娛神飈清管發逸興白雲俱  
我醉聆猿狖南行愁鷓鴣祗今遙憶處明月隴山孤

薛蕙

寄何中舍

翰墨何顛顛英靈有屈伸千年關氣運一代出精神  
夫子興篇什聲名動縉紳波瀾含詭譎刻削露嶙峋  
李杜邠堪數曹劉不足陳無人宗大雅舉世擬凡倫



文學元同列風騷自有鄰  
新章標創始舊例起湮淪  
已覺空前輩懸愁絕後塵  
價卑皆咄咄力怯謾逡巡  
綺麗才難竝湛冥道所珍  
逍遙歸母氏杳眇入天人  
霄漢心常遠神仙意獨親  
緒言存著作大業負經綸  
蹤跡升沉隔交情契合真  
過逢頻下榻離別據沾巾  
太國仍初服還鄉似昔貧  
丹房天上藥酒肆世間身  
青瑣辭通籍滄洲憶問津  
倘逢桐栢隱訪爾故山春

送顧華玉邊廷實歸南都

邊顧文章伯聲名三十年  
價高雙白璧調逸兩朱絃  
憶昨初傾蓋看君早着鞭  
龍門愁峻絕驥尾慕寅緣  
中歲逢迎阻清宵夢想偏  
盍簪重見日鳴玉竝朝天  
置酒春壺滿題詩錦字連  
城隅方曲讌陌上忽離筵

言送東南美真如李郭仙  
望塵悲往路臨水惜徂川  
吳會浮雲外燕京落日邊  
相思日延佇須枉濟江篇

孫一元

贈殷近夫靖江二十韻

霄漢瞻多士君才滯一方  
青袍走吏卒白馬照江鄉  
學與前賢翼名應後輩光  
文鋒膏鵬鴉政理臥桁楊  
吳楚瘡痍地乾坤戰伐場  
孤城危此日哀笛動清商  
萬里憂南服羣兇睨海疆  
輶輜防破取號令極飛揚  
涕爲黎元墮心應末俗傷  
風雲看變合形勝認低昂  
謀食同鷄鶩危身破犬羊  
農間留武備帝上演天潢  
喪亂哀孫楚賓朋憶鄭莊  
朱子曰以當時比繼之也獨憐清詠  
苦每愛劇談長去國烟雲異故園  
橘柚荒土風猶未



習水味只新嘗鳥盡滄波濶天低落日黃子情惟浩  
蕩吾志正悲涼歲宴舟檣闕途窮菘菘芳猶懷西北  
念夢寐耿難忘

友雅卷中

友雅卷下

豫章朱 多炤 孔陽 編

七言律詩

李夢陽

牡丹賞歸東邊王二子

非因絕代專芳品豈復郊園守後時夜靜雨姿應更  
劇野寒風盡莫頻吹空齋獨憶香仍滿晴日重尋路  
不遲肯擬飛觴留健筆願攀驄馬護高枝

郊齋逢人日有懷邊何二子

今日今年風日動苑邊新柳弱垂垂齋屋寂寞難乘  
興獨立蒼茫有所思谷煖遷鶯番太早雲長旅鴈故  
多遲鳳池仙客容臺彥兩處傷春爾爲誰

章氏芳園餞朱應登

細雨林塘花可憐况有美酒斗十千見日玄蟬元嘒  
嘒含風綠篠自娟娟朝廷豈料更新主塵世難逢感  
昔年縱倒芳尊不成醉別懷憂緒兩凄然

別徐子禎卿得江字

我愛南州徐孺子明瑤美璧世無雙新從北極看南  
極便自吳江下楚江日落鷓鴣啼廟口水清斑竹映  
船牕禰衡王粲俱黃土千載何人復此邦

追舊寄徐子

憶昔逢君雪滿途遙憐爲客向江湖看碑定憶羊開  
府作賦先投楚大夫日黑魚龍逐夢澤草青麋鹿上  
姑蘇空揮玉軫思流水不得驂騑見過都

過李氏荷亭會何子

三伏尋花到習池幽懷真與故人期出波菡萏晴相  
竝度檻流螢晚故遲他日宴遊能此地向來開落果  
由誰亦知塵世難逢醉且把芳筒當酒卮

病間聞何舍人夢故山有感

我逢新歲兼新病君夢故園登故山木杪啼猿行問  
訊枕邊流水莫潺湲深春古廟同誰往絕壁孤雲只  
自攀悵恨無家傍林谷定因何處卜鄉關

寄徐子

徐子南游涉洞庭楚江風浪眼冥冥竭來振玉朝  
天子忽漫傳書與客星訪戴難移剡溪棹問奇曾過  
子雲亭烟沙水國催春發楊柳愁邊却盡青



九日寄何舍人景明

九日無朋花自開，登樓獨酌當登臺。  
孤城落木天邊下，萬里浮雲江上來。  
但遣清尊常不負，從教白髮暗相催。  
梁南楚北無消息，寒鴈風高首重回。

喜鄭生至自京師傳崔陸徐何諸人消息

汝從京國傳消息，屈指離吾幾換年。  
當日應劉俱老健，竭來燕趙自風烟。  
陽回草木清霜後，歲暮賓朋醉眼前。  
別業舊臺携手在，野鴻沙鳥日翩翩。

東邊子變前韻

繁丘草青春可憐，欲往恰值春風顛。  
應門童子不通客，空同先生閑自眠。  
柳長故嫋金色縷，梅落盡鋪白玉錢。  
安得卽遊共爾閣，滿引香醪花簇筵。

仲春繁臺飲餞醉歸口占呈陳邊二使君

晝日起風花欲開，過鴻未盡巢燕來。  
看山已嚴陽翟駕，羣餞復聚梁王臺。  
苦云離合每不易，便醉顛倒何嫌猜。  
背閣碧樹故裊裊，當筵哢鳥時徘徊。  
不見當年艮岳盛，今日纍纍青草堆。

夏日繁臺院閣贈孫兵部兼懷大復子

獨馬孤城送客迴，亂蟬高柳出銜杯。  
晴天河岳今開閣，戰地金元晚上臺。  
才自籌邊期獻納，義猶傾蓋愧徘徊。  
何休門客如君幾，北望天風萬里來。

寄題孫氏茗溪草堂孫是時始有婚事

茗溪之傍何者丘，幾時自卜林塘幽。  
已聞寬田足放鶴，曾否餘錢兼買舟。  
狎人瀾鵠元成偶，近檻芙蓉故



竝頭塵世要留風格在東南聊作醉鄉遊

春望東何舍人

城南春望春可憐小苑高樓生煖烟幾家芳草斷腸處無數落花吹笛邊川原萋萋入暮雨車馬駸駸少年欲向仙郎誇白雪陽春久已絕人傳

乙亥元日東臺省何邊二使君邊病臥久

煙和日翠且重樓洶洶綺羅悲此州碧草可容漳浦臥官梅真憶廣陵遊來鴻太燕催今昔栢葉薇花阻倡酬興發春山能約往冰開仙楫擬乘流

乙亥元夕憶舊東邊子臥病不會

憶昔金錢竝卜歡稱心燈火獨長安鑪香欲散尚書省環珮先歸太乙壇十載酒杯誼五夜九衢遊馬閱

千官蓬將轉合今同此月滿梁園却自看

邊舊太常故曰太乙壇

邊貢

春日有懷空同李子

南中數往故人書北上蹉跎信轉疎四海酒杯形影外十年詩草夢魂餘藏身笑我同方朔作賦憐君過子虛春入吹臺芳草徧塔雲樓月近何如

次獻吉留別韻

初春郊甸積雪滿客子出門岐路長征車杳杳去不息關柳青青愁未央却望泰山懷故道卽歸梁苑亦他鄉十年京洛交游地日夕風煙思渺茫

除夕臥病東空同李子

天涯臥病驚除夕河上逢人感昔遊歲月浮生雙鳥



翼風塵遠道一狐裘君還豈爲鱸魚膾我出真同雪  
夜舟梅蓋柳條俱動色幾時携杖竝登樓

人日答何李二子見懷之作

夾道煙花十二樓大梁歌吹古名州當年尚憶愁中  
過此日那教病裏遊司馬調高真寡和謫仙情重若  
爲酬青燈白髮春堂晚臥嘆年華似水流

坐上次韻贈朱升之

暫維沙舸憇蘭皋爲訪金陵舊吏曹南鴈獨衝淮甸  
雪北風遙送海門濤尊開子夜情俱洽賦入陽春調  
轉高起舞對君還照影笑看吾髮已才騷

金陵春日有懷孟有涯兼憶亡友大復子

往在東山賦索居竭來南國轉愁予風前玉樹時難

見袖裏瑤華日漸疎京洛舊傳東野句茂陵新出長  
卿書交遊意氣關生死伐木歌殘恨有餘

哭同年范副使淵兼悼亡友徐博士禎卿同

空同李子作

五年奔走別朝班涕泪長因舊侶潛在楚早傷徐孺  
子遊梁今哭范君山孤蒐夜繞青楓闕徐卒旅殯春  
移玉壘關范卒于蜀兩地荒墳吊何日夢迷岐路只空還

朱應登

次韻答徐昌穀廣文

故友相逢杯酒懽夜深幽思結寒盤京塵習慣卅年  
久郢雪才高和者難客裏歲華傷荏苒袖中書字喜  
平安聞君注易今多少想見青氊坐已殘



何景明

秋興八首

今錄其一

秋來門巷少經過，日日幽懷對薜蘿。一笑流光拋客路，十年歸夢落漁簑。沙邊返照寒初斂，水上浮雲晚故多。苦憶梁園辭賦客，黃河愁望渺烟波。

時李獻吉在汴州

晚過君采次韻

朔雲臥對寒城菊，燕月留沾晚市醪。向客薜蘿南國遠，背人鴻鴈北風高。杜陵愁極惟雙淚，潘岳情多已二毛。同病相憐不同本，莫將江海問西曹。

得獻吉江西書

近得潯陽江上書，遙思李白更愁予。天邊魑魅窺人過，日暮鼃鼃傍客居。鼓柁襄江應未得，買田陽羨定

何如。他年淮水能相訪，桐栢山中共結廬。

夜過君采

天邊歸客滯寒城，下馬殘尊萬里情。冬館明燈猶艷菊，水鄉春棹杳啼鶯。風塵歲暮愁相送，險路人間恨獨行。莫把悲歌助哀析，北堂今夕淚沾纓。

懷寄邊子

汝從元歲侍，今皇誰念先朝老。奉常一出雲霄空，悵望十年岐路各。蒼茫春天縹緲金莖露，晝日氤氳紫殿香。獨有楊雄尚陪從，白頭抽筆賦長楊。

徐禎卿

晚過獻吉齋所

端居聞子肅清修，吏散鴉啼省樹幽。芳草不知人獨



往空山何意鳥相求  
開軒歷歷明星夕  
隱几蕭蕭古木秋  
自昔風塵堪吏隱  
浮生莫遣有離憂

贈別獻吉

汝放金鷄別帝鄉  
何如李白在潯陽  
日暮經過燕趙客  
解裘全醉酒壚傍  
徘徊桂樹涼飈發  
仰視明河秋夜長  
此去梁園逢雨雪  
知予遙度赤城梁

寄獻吉

昔聞已卜扶溝廬  
爲復還從河上屈  
嵩雲落日遙在眼  
鼉沫蛟渦愁故墟  
一掬那傳少陵泪  
經年不見茂旣書  
荒村豺虎眠難穩  
好共滄江學釣魚

庭實久約携酒見訪不至貽詩嘲之

九月秋風吹破廬  
長安城中愁索居  
籬邊未見陶潛

菊門外空傳長者車  
黃塵鬱鬱倦爲客  
肺病時時強著書  
聞道白衣將送酒  
荒蕪庭徑擬親除

感興懷獻吉

客舍秋風動客哀  
殘花秋日伴殘杯  
虛名久愧爲身累  
白眼那能免物猜  
落魄京華空老大  
旅魂江漢好歸來  
山川矯首浮雲迥  
倚杖遙登何處臺

聞庭實上計不與悵然有懷

輶車十月四方來  
奈爾辭天獨未回  
遠在荆南淹蜀盜  
祇從極北望燕臺  
子山涕泪秋難盡  
杜甫干戈老更催  
牢落梅花江閣迥  
肯拚碁局負深杯

鄭善夫

送太初觀海



天風颭颭吹歲暮汝今復欲東南征大江波浪蛟出  
舞滄洲歲月芝長生水經地紀足勝事鳧鳥鷺瓢非  
世情洪河雪後會相憶我在蓮花峯頂行

聞孫山人在西湖水寺

吳門往日聽談玄塞鴈江魚動隔年聞爾獨居水西  
寺與誰同泛六橋船魚翻荇帶錦不亂鳥下蘼蕪青  
可憐擬把郢筒共梅蕊兼程定得小春天

孤山寄太白山人

爲問山人孫太初交情歲晚莫教疎孤山梅萼春相  
惱滿地松苓日自鋤江夏肯容禰處士茂陵初卧馬  
相如知君不廢茗溪釣書帛能無寄鯉魚

太白山人

太白山人去不返青天高映白雲袍慣從赤縣觀滄  
海未向黃塵拂寶刀狂癖禰衡終自信醉鄉王績欲  
何逃茗川蔀屋風波外長日漁樵生計勞

不見

年來不見孫明復布褐綸巾何處山長日著書元自  
得早時譚劍有餘閒吳門雪水風塵上麟閣雲臺天  
地間未返初衣重憶汝釣竿何日共潺湲

昔余北征孫太初至自湖洲送余至姑胥吾

惟可至自三衢送余至樵李不二載間相

繼下世重逢此地愴然傷懷作哭二子詩

憶從把抱三吳去念汝攀翻遠道來此後音塵一哭  
耳舊時風雨竟何哉江山祗掛南州劍天地空生諸



葛才構李姑胥是末別暮雲鄰笛動秋哀

西湖過孫山人舊隱昔曾與太初用賓月下  
步六橋令僧人弄笛嘯歌爲和回首往事  
黯然陳迹矣

荒迷更踏西湖路露鳥雲裳空六橋涕泪翻悲竹林  
宴笛聲月色傍中霄醉歌亂詫魚龍出此地爭傳麟  
鳳標今日孤山最孤寂梅花桂樹頓蕭條

### 讀潯陽歌

青春寄我潯陽曲長路思君鸚鵡洲此日江湖須遠  
志浮雲西北有高樓嵇康竟少神仙分尚子仍牽兒  
女憂屈洛何曾定蹤跡終南渭水入鄉愁

節入洛蹤  
跡已定耳

薛蕙

### 贈繼之

長安城中不可留風塵日日使人愁上書解印我將  
去拔劍出門君且休五岳登臨幾兩屐三江來往一  
扁舟東西南北好行樂與爾相隨萬里遊

孫一元

同顧九和侍講鄭繼之戶部顧與成正郎殷  
近夫縣令泛太湖作軍中樂酒酣賦詩

洞庭秋老翠陂陀景物恢竒望裏過石柱天風迴鶴  
鶴海門波浪見鼉鼉帆檣萬里憐漁父鼓角中流和  
櫂歌獨倚蓬牕渾不醉浮雲西北意如何

夢鄭繼之



不見平生鄭廣文風塵側望隔青雲殊方物色偏憐  
客兩夜燈花頻夢君隔葉山鳩高自語避人江鶴獨  
爲群眼中此日堪惆悵塞北音書久未聞

送少谷子繼之

少谷山人去不返洪河素舸坐長空一官臥病菰蒲  
裏萬里看山烟霧中海內談詩名已動夜深說劍氣  
還雄關西野客應憐汝君有當年季子風

憶鄭少谷

年來苦憶鄭夫子獨坐幽林興轉孤晶晶鷗群迴晚  
日青青菱葉散春湖何時共採金鵝蕊此日君猶銀  
兔符一笑滄洲終自去那堪風物眼中殊

七言排律

李夢陽

七夕邊馬二憲使許過繁臺別業不成輒用  
七字句述我志懷二十韻

懶遊因病困蒙茸不獨炎天萬事慵七夕邀行齊踴  
躍兩人羈絆阻迎逢大河平地濤長湧喬岳清秋霧  
不封次第榮途俱解豸迂疎故國且芙蓉壯夫激烈  
悲遲暮執友團圞喜去冬久避鴛肩優諫諍亟推經  
笥貫中庸繁臺禹廟梁王榭古寺殘碑宋代松吾企  
杜高名不及汝追枚馬涕何從虛疑豪俠輕朱亥實  
被文章誤蔡邕憤起鐵椎心枉費曲終焦尾意還濃  
不爭期約慚牛女恐使流傳笑駉蛩末俗但知張市  
虎異時誰切辨衣蜂云吁世路聊三徑敢說天門尚



九重寵豈盡軒衛國鶴盡宜偏駭葉公龍菟園卜築  
鄰猿島茅屋昏晨節梵鐘修竹鴈池雖慘慘水花雲  
葉固溶溶悔將朱紱拋漁艇誓住丹丘學老農爲底  
回驄孤蟋蟀徒思臨沼共鱖鱖踟躕莫畏風沙眯吊  
唁應愁輦路衝許過只須圖酪酏有談毋遽及徽宗

何景明

寄李郎中

星辰畫省鳳凰池同接金門白玉墀庭樹書閑褰碧  
幕苑花春好竝金羈西京車馬誰言樂東漢衣冠忽  
已悲萬里艱難歸故土兩鄉迢遞限雲達青真垂翅  
人皆惜白日批鱗世所知天上神仙元有謫古來賢  
聖本多危陸機入洛名逾盛司馬遊梁賦益竒海內

兢傳高士傳朝廷誰訴黨人碑齊堂雷震寃臣出魏  
闕天高獄吏欺千古死灰安國淚萬年災異廣川辭  
虞羅亦放真飛鳥卜獵何煩後載罷得失竟須知塞  
馬榮華終不易塗龜嗟予蹇拙慚君匹念汝風流實  
我師索處自應思故舊生涯今已笑支離遨遊昔忝  
登龍會驚下深懷附驥思貢禹王陽同出處鍾期伯  
子是交期河陽雲樹情俱苦渭曲烟花願豈遲回首  
西山多寇盜扁舟南國有旌旗腐儒潦倒愁溝壑遊  
子飄零枉歲時路阻時危難會面不禁涕淚望君垂

五言絕句

李夢陽

寄徐子二首

紫閣朝回夜金尊月映空祗應徐進士遙憶李郎中  
其二

東省堂前樹南陽宅裏花春風如往日夜月向誰家  
贈何舍人

朝逢康王城暮送大堤口相對無一言含悽各分手  
何景明

寄李獻吉二首

君作梁園客予登楚水臺春風河上柳不寄一枝來  
其二

渭水天邊樹黃河日暮流春來千里外知爾故鄉愁  
晚出左掖簡君采二首

玉橋迴宛轉丹闕對嶙峋出入雲霄上蹉跎江海身

其二

露重芙蓉館雲輕翡翠城文園病司馬消渴望金莖  
徐禎卿

答獻吉

花發平章宅鶯啼省樹春殷勤花鳥意愁殺獨游人  
七言絕句

李夢陽

僕思李白落鴈之遊徐子亦有知章鑑湖之  
請念人悲離申此短贈徐子者禎卿也

君擬天台度石梁我歸沙苑望咸陽予今夢寐蓮華  
岳笑爾番耽瀑布長

太白山人仙遊吳越稔矣日者卜居吳興而



婚施氏妻妹予聞之輒詩嘲焉二首

范子無端出五湖西施竝載有耶無詩人只合鶯鶯伴施家今是大姨夫

其二

見說仙人萼綠華萼綠華晉昇平中降羊權家麻姑亦降蔡經家  
即防獅子河中吼背癢無言爪得爬

邊貢

寄何仲默

梁王臺前春草生梁王臺上鳥嚶嚶美人遙在黃金屋客子登臨空復情

枕上簡獻吉二首

自入秋來日日晴看花看月每同行一夜六街風雨

惡莫言天不解離情

其二

早涼衝曉入紗帷聽雨聽風睡起遲街西咫尺不相見却似河梁別後時

朱應登

口占五絕句其一

文章康李傳新體驅逐唐儒駕馬遷更羨崔何能濶步今人重見馬蹄篇

何景明

贈薛君采二首

五花似玉麒麟骨八尺如龍駮裹身千金臺上求非易萬馬羣中認未真

其二

爾夢仙人海上行  
蓬萊清淺不勝情  
金門再見東方朔  
笑指蟠桃花更生

寄少谷山人二首

武夷九曲上仙庭  
錦疊青天萬仞屏  
下望神人釣鰲處  
北風吹霧海冥冥

其二

台岳中峯綵霧生  
石梁遙挂赤霞城  
仙潭尺素傳雲鯉  
報爾今尋華頂行

鄭善夫

赤城懷太白山人

天台歲月輕劉阮  
不見雲端雙玉簫  
知爾西湖臥風

雪神遊先到石梁橋

送人遊吳興

黃龍洞下雲色深  
雪水苕溪吏隱心  
東道若逢孫處士  
青春須寄峴山吟

送平厓侍御使齊魯十首

今錄其一

海內談詩王秉衡  
春風坐遍魯諸生  
我昔傳聞薛吏部  
為君遙式洛陽城

薛蕙

奉同何大復苦熱行十首

今錄其三

崆峒霜雪近幽燕  
閩闔神仙捧御筵  
舍人退食苦炎熱  
卑濕南方更可憐

其二



三年臥病楚江扉六月池臺滿眼稀玉簫樓上含烟

霧只許仙人醉酒歸仲默少時夢至一樓

其三

盤古山中太始雪六月天邊萬里風下界竝愁炎火

劫丈人長對水晶宮大復山一名盤古山

遠遊曲十首贈鄭繼之并序

祠部鄭少谷以病謝歸烏石山中先將抵

杭越訪天台四明諸山南循浙江望閩海

而返余壯其行賦贈之

烏石山中生紫芝少谷先生歸太時贈君試作遠遊

曲較似仙人碧落辭

其二

闕下屢移稱病書知爾不復少踟躕海上但留雙玉

舄山中誰見五雲車

其三

五嶽之山君遍過名山不比浙江多赤城直上仙人

闕天姥斜連織女河

其四

赤城宛轉石為梁雲裏振衣千仞岡聞道台州老太

守為君先已築丹房顧華玉時刺台州

其五

太白山人高士流十年不出臥滄洲爾太相逢託相

訊南來倘許共扁舟

其六

越中會稽天下無金庭玉室是仙都卽向山陰覓芝  
草還從禹穴探靈符

其七

丹山赤水足華滋鴈蕩龍湫更自奇招隱頓憐君去  
早移文應笑我來遲

其八

鏡湖綠水画難成五月南風菡萏生越女舟中歌白  
苧道人醉臥酒船行

其九

海門東去片帆歸却傍三山開釣磯人間物色那能  
見空向青天望少微

其十

天地今經幾劫灰區區人世只堪哀莫漫著書拋歲  
月徑須食玉訪蓬萊

戲成五絕

今錄其一

東髮從師王浚川文章衣鉢幸相傳爾時評我李何  
似白首摧頽只自憐

四言古詩

附

鄭善夫

菖歎二章贈太初

菖歎葱葱在彼澗濱歲茁九花世人不紉秘之穎谷  
以俟雲君念彼葦菴蒼蒼廣津

菖歎青青在彼原隰歲茹九節可以絕粒華滋寂寥  
爾乃獨立世無神皇鳳衰麟泣



友雅卷下終

隆慶己巳歲  
依隱亭梓行

右友雅三卷乃吾友弋陽詞宗  
孔陽所輯也孔陽喜弘正間李  
何諸君子之作而以不得與同  
時為恨遂彙其贈憶宴餞諸作  
為一編題為友雅者若詩之雅  
也然予與徐鄭則嘗挹其風度  
遲實在乙酉歲會于金陵予兄

弟失解推以酒夜過顧氏草堂贈  
詩有文章不入詞林選化作長  
江五色流之句太初則久寓吳  
中往還尤密其志態超脫真神  
仙中人嘗索予作茗谿草堂圖  
不意遽亡遂負此約君采曾校  
刻其集升之雖未接而其子九

江太守子休契誼尤篤惟李何  
則無一跡然二集皆刻吳中予  
得從事焉李至京口時有約同  
謁者亦不果行今客窓展閱不  
勝今昔之感夫孔陽以不及一  
接為恨予幸託諸君子未契而  
白首無成則披覽此編雖可喜



亦可愧也

隆慶二年歲次戊辰仲冬十有  
一日茂苑文嘉題于豫章之青  
雲公館



友雅後序

夫三百之旨經訓並垂六藝之科  
絃誦在列上以占世運而下以考  
民風詩之繫厥惟重哉黃初以還  
音徽漸替濡毫之士翦然林集而  
棄筌蹄趨上乘者哲匠尤或雜之  
則又詎謂鏗鏗音似間已耶我  
國初聲教丕修而文運未墜著述

之體尚延卑弱嗣是若李何徐戴  
輦鍾百年之間氣振異代之休聲  
奮臂如雲吐詞若玉愛乎追作者  
而上之已願人代既殊則流風漸  
泯君子覽顧司寇之寶編陳太史  
之哀辭未嘗不撫膺三歎也江藩  
孔陽氏乃倣二公之意徧搜羣集  
中凡所倡和贈答典夫傷離悼往

之篇自諸子之外復廣以邊薛二  
人共得諸體詩若干首梓為友雅  
石翁夫子既以雄文弁之已暇日  
以介余曰願一言以明予志余惟  
詩之感人也深而其為教也微然  
漢魏之詩古六朝綺靡唐稍反古  
天寶以下六無聞焉文章與世升  
降其末遠乎在昔弘正間道化久



而愈彰風氣鬱而益暢一時人士  
非典謨之文不讀非雅頌之音不  
談雍容廊廟者既奮其翎翬之猷  
幽栖巖穴者亦厲其清修之操故  
飛聲振響動闡心靈攄臆構精頓  
超神理以營不朽之業而昭盛德  
之光美哉颯颯乎不可尚已若夫  
稽古鑒今黜浮榮雅樹詞林之赤

幟而備一代之獻之徵則茲集也  
固當與彛鼎共珍而咸濩協奏哉  
然顧陳二公生同其時托於子期  
之知其所敘述哀憶詎出友生惟  
茲心慕掛劍契此倚蘭無俟生平  
竟鼓雅志豈非神交聲應好古而  
尚友之者與孔陽博覽旁通偕其  
伯仲並以文詞著是編之刻特冀

鼎一鬻云爾余非知詩者姑述取  
以刻者之志質諸大雅  
皇明隆慶己巳長至日西山樵人  
同郡方來崇士功甫書





